

2022



थाँकाणी दुक पे चेतो देओ तो रोग
दुकी रेओ, थाँकाणी सुक पे चेतो देओ,
तो रोग खुस रेओ, काँकी थाँकाणी गणी
पे चेतो देओ वा चीज हुस्यार वे गई



जामण
आपणो मेवाड़
गुलई ऊँ सितम्बर 2022

छापवा वाळा
निर्माण सोसाइटी
www.mewari.org.in


nirmaan
empowering communities

रास्तान सरकार ऊँ मुख्यमन्तरी करसक साती ओजना चालू किदी तकी हे।
 अणी ओजना ने चालू करबा की गोसणा रास्तान का मुख्यमन्तरी अशोक गहलोत ने 24 फरवरी 2021 ने चालू किदी।
 अणी ओजना ऊँ जदि करसाण को फारम भरता तका करसाण की मोत वे जावे कन पछे वो अपंग वे जावे तो वीने जेलो देबा को नेम भी बणायो तको हे।
 ये रिप्या को जेलो 5000 ऊँ लेन 2 लाक रिप्या तक देवे हे।
 जदि मुनापो लेबा वाळा की मोत वे जावे, तो आवेदक करसाण का परवार वाळा (उरतादिकारी) वेई अन जदि करसाण अपंग वे जावे तो आवेदक खुद अपंग करसाण रेई।
 अणी ओजना में मुनापो लेबा के बाते करसाण को फारम भरन भडा का विभाग में जमा कराणो पेड़ी।
 यो फारम दुरगटना का 6 मीना का मइने करसाण ने जमा कराणो पेड़ी।
 जदि करसाण दुरगटना वेबा का 6 मीना केडे फारम जमा करावे तो अणी टेम में वीने अणी ओजना को मुनापो ने मल सके।
 अणी ओजना का मइने मल्या तका रिप्या करसाण आपणो एलाज करा सके।
 मुख्यमन्तरी करसक साती ओजना मइने दुरगटना वेबा के बाते रिप्या की तंगी के बाते भी लडबा में करसाण की मदत मेली।
 अणी ओजना मे मुनापो लेबा के बाते करसाण की उमर 5 ऊँ 70 साल का बच में वेणी छावे।
 करसाण की मोत कन अपंग वेबा की दुरगटना ऊँ वे जावे तो करसाण ने अणी ओजना को मुनापो मल जाई।
 आत्महत्या कन पछे सादारण मोत का मइने अणी ओजना में सामल ने करे।
 थाँकाणी अणी ओजना का मइने ऑनलेण अन ऑपलेण दुई तरे ऊँ फारम भर सको हो।
 जट सरकार ऊँ अणी ओजना का मइने फारम भरबा को काम चालु कर देई।
 अणी ओजना को बजट सरकार वाळा 2,000 करोड रिप्या के भरोसे राक्यो।
 रास्तान मुख्यमन्तरी करसक साती ओजना 2022 की पातरता
 अणी ओजना में मुनापो लेबा के बाते अपंग करसाण पंजीकरण वेणो जरूरी छावे।
 जदि करसाण की मोत वे जावे तो मुनापो लेबा वाळा मनक पंजीकरण वाळा करसाण को छोरो, छोरी कन पछे लोग लुगई वेणा छावे।
 अणी ओजना को मुनापो लेबा के बाते मरबा वाळा कन स्तई अपंग वाळा मनक की उमर 5 ऊँ 70 साल का बच में वेणी छावे।

अणी ओजना को मुनापो लेबा के बाते मोत कन अपंग दुरगटना ऊँ वेणी छावे।
 आत्महत्या कन पछे सादारण मोत में अणी ओजना का मइने सामल कोइने हे।
 फारम भरबा वाळा ने दुरगटना का 6 मीना का मइने आपणा जिला करसी अधिकारी का ओपिस में फारम भरणो पेड़ी।
 रास्तान मुख्यमन्तरी करसी साती ओजना 2022 का जरूत वाळा कागज पान्दडा
 रास्तान मुख्यमन्तरी करसक साती ओजना 2022 का मइने फारम भरबा के बाते निम्न कागज पान्दडा की जरूत हे।
 निरदारित परपतर में फारम
 एफ आई आर अन सपोर्ट पंचनामो पुलिस पुछताछ रिपोट
 मरबा की टेम में पोस्टमार्टम रिपोट कन मरत्यु परमाण पतर उमर को परमाण
 सब डिविजन मजिस्ट्रेट की केस स्वीकरती रिपोट
 स्तई अपंग का मामला में मेडिकल बोर्ड / सिविल सर्जन को विकलांगता परमाण पतर अन अपंग की तस्वीर
 सतिपूरति बॉन्ड
 हेयर डिटेल रिपोट
 बीमा निरदेसक वऊँ पुछबा वाळा परमाण
 रास्तान मुख्यमन्तरी करसक साती ओजना 2022 का मइने फारम भरबा को काम
 जदि थाँकाणी रास्तान मुख्यमन्तरी करसक साती ओजना 2022 का मइने फारम भरबो छावो तो थाँने ये नेम मानणा पेड़ी।
 सबाऊँ पेल्याँ थाँने थाका जिला का करसी विभाग में जाणो पेड़ी।
 इका केडे थाने वटे रास्तान मुख्यमन्तरी करसक साती ओजना को फारम लेणो पेड़ी।
 अबे थाने फारम में पुछी तकी हारी खास जाणकारी जस्यान थाँको नाम, फोन नम्बर, पतो नंगे राकन भरणो पेड़ी।
 ईका केडे थाँने फारम का खास कागज पान्दडा ने अटेच करणा पेड़ी।
 अबे थाँने यो फारम करसी विभाग में जमा कराणो पेड़ी।
 ईका केडे थाँकी जाणकारी जमा किदा तका कागद पान्दडा ने सत्यापन करणो पेड़ी।
 जाँच वेबा केडे मुनापा का रिप्या करसाण का खाता मे पुगा देई।

लोकगीत

इण बनड़ी रे च्यार -च्यार बेना

ईण बनड़ी रे च्यार-च्यार बेना, च्यारुई बेना
चटकाँ खारी रे हाँ।२।

च्यारुई चटकाँ खारी बनड़ी, घुघरियाँ गमकावे
ओ।२।

मोटीतो बापड़ी कई नई जाणे, नानकी तो
कामणगारी रे हाँ।२।

नानकी कामणगारी बनड़ी, घुघरियाँ गमकावे
जी हाँ।२।

ईण बनड़ी रे च्यार-च्यार भाभ्याँ, च्यारुई
नकरा कारी रे हाँ।२।

मोटीतो बापड़ी कई नई जाणे, छोटकी
कामणगारी रे हाँ।२।

छोटकी या तो कामणगारी, मोटकी रे भोळी
कारी रे हाँ।२।

ईण बनड़ी रे च्यार-च्यार माम्या, च्यारुई
चटकाँ कारी रे हाँ।२।

मोटीतो बापड़ी कई नई जाणे, छोटकी तो
कामणगारी रे हाँ।२।

छोटकी तो कामणगारी बनड़ी, घुघरियाँ
गमकावे जी हाँ।२।

लाल बन्नी रे च्यार-च्यार काक्याँ, च्यारुई
चटकाँ खारी रे हाँ।२।

मोटीतो बापड़ी कई नई जाणे, छोटकी तो
कामणगारी रे हाँ।२।

छोटकी तो कामणगारी बनड़ी, घुघरियाँ
गमकावे जी हाँ।२।

लाल बन्नी रे च्यार-च्यार मास्या, च्यारुई
कामणगारी रे हाँ।२।

पारस्याँ

1. पाँच परेवड़ा पाँच ई रंग, घर में गुसे तो
एक ही रंग।

– पान

2. दो बतकाँ के दो इण्डा एक उनो एक
हीळो।

– हुरज अन चाँद

3. बत्तीस फींपळ्याँ के एक पान्दड़ो।

– दाँत अन जीब

4. मूँ लीली मारा बच्या काळा, मने
छोडन बच्या ने खावे।

– इलायची

5. एक मंगरो अस्यो जणिमें पाणी भर्यो,
रुकाळो विंको तीर चलावे आद अणा दे
नानी।

– माक्याँमाळ अन छातो।

कावताँ

1. अणहमज को कुई कोईने, हमजदार की
मोत।

अर्थ- नासमझ अपनी जिम्मेदारी को
महसूस नहीं करता है।

2. ई कान हुणणी, वीं कान निकाळ देणी।

अर्थ- किसी की बात को सुना -
अनसुना करना।

3. अण्ट आयाँ लेवाँ।

अर्थ- समय आने पर बदला लेना।

4. अतरा ज्योई हतरा।

अर्थ- जब किसी व्यक्ति को एक काम के
साथ में और करने के लिए कह दिया
जाए तो वह कर लेता है।

मेवाड़ी खेल

गुल्ली डण्डा

गुल्ली डण्डा आकई भारत को ठावो खेल हे। इने गोळ माळ एक लकड़ी का डण्डा मूँ खेले। लकड़ी की कामड़ी 2-3 हात की वेवे। अस्यानीस बेंत खाण मोटी लकड़ी की बणी तकी गोळ माळ अन वींका दुई मुण्डा तीका वेवे विंने गुल्ली केवे। मेवाड़ में बाळक हात में एक लकड़ी को डण्डो अन गुल्ली लेन खेलता तका नजर आजावे, पण टेम की लारे लारे यो खेल लमसम खतम वेबा की लेण में आग्यो। अणी खेल में सबाऊँ मोटी बात या हे अणी में खेल का सामान का नाम पे कई खरच वेबा वाळी बात कोइने। बस खाली इमें एक दो-तीन फीट लकड़ी को खाँपो अन एक गुल्ली जिंके दुई कनारा ने तीका कर देवे। जिंकाऊ वींके कंट्या की ठोकबाऊँ गुल्ली उछळ सके।

खेल को नेम

अणी खेल ने खेलबा का नेम भी घणा होरा रेवे। खेल चालू करबाऊँ पेल्याँ जगाँ में एक दो इंच ऊण्डो अन च्यार इंच लाम्बो खाडो खोदणो पड़े अणी खाडा ने 'गुच्ची' बोले। एक खेलाड़ी वीं खाडा पे गुल्ली ने मेंलन जोरऊँ कण्ट्या मूँ छेटी उछाळणी पड़े। अन दूजा खेलाड़ी विंने पकड़बा के बाते त्यार रेवे, गुल्ली ने पकड़ लेवे तो वो खेलाड़ी आउट वे जावे अन गुल्ली रेटे पड़ जावे तो गुल्ली की गुच्ची के भड़े पड़्या तका कण्ट्या के जोर की ठोके। पछे कण्ट्या ने वीं खाडा पे वींने मेंल देवे। दूजी टीम को खेलाड़ी डण्डा के ताँक बान्दन ठोके विंदाण गुल्ली फेंकती दाण खाडा पे मेल्या तका कण्ट्या पे निसाणो लगा लिदो तो खेलाड़ी बान्ने वेजई। बान्ने ने वेवे तो वो खेलाड़ी आपणा कण्ट्या ने लेन गुल्ली का एक मुण्डा के ठोकतो जावे अन गुल्ली बइरा में उछाळतो तको कण्ट्या मूँ छेटीऊँ छेटी खन्दावे।

जिंकी गुल्ली जतरी छेटी जावे वो अणी खेल में जीत जावे। जटे गुल्ली पड़ी वे उटूँ खाडा के बचली जगाँ ने कण्ट्याऊँ माप नाके। मपती करती दाण जतरा कण्ट्या वेवे वतरा आँकड़ा वीं टीम ने मले। अणी तरेऊँ खेल खेले अन हारबा वाळी टीम ने हरत का हस्याबऊँ डण्ड देवे। यो खेल हरेक मनक कन टीम का लारे खेले। इमें कुई हार-जीत की भावना ने वेवे, यो बिलकुल खेल की भावना मूँ खेलबा वाळो खेल आज यो खतम वेतो जार्यो हे।

अणी खेल में खेलाड़्याँ की गणती कतरी बी वे सके, ज्यो 2, 4, 10 कन यामूँ भी हेली वे सके।

हेचेत

अणी खेल में आँक्याँ में लागबा को होच हेलो रेवे अन यो खेल घणो हेचेत रेन खेलणो छावे।

भजन

भेरूजी (भजन)

सुदार काज दास रो पदार भेरवा ॥टेर॥
रमन्त आप कासी में दिपक लेरवा,
पाँव बान्द घूघरा, घमंक भेरवा,
सुदार काज.....॥1॥
रमाय तेल अंग में, फुलेल फेरवा,
सवार होय स्वान पे, बजाय डेरवा,
सुदार काज.....॥2॥
ओगट घाट करत नन्दी नेरवा,
दुस्टों को देक तपो तेज तेरवा,
सुदार काज.....॥3॥
पदम दास सरणे थारे राको भेरवा,
सेवग की रक्षा करने आवो भेरवा,
सुदार काज.....॥4॥

सम्पर्क

निर्माण सोसायटी

फ्लेट नं. 4, प्रथम मंजिल, जानकी मोहन कॉम्प्लेक्स,
उदयपुर रोड़, पाँच बत्ती चौराहा के पास, कपासन, चित्तौड़गढ़,
राजस्थान - 312202, फोन नं. - 01476-230014, 9660663776

Email - rajasthanlanguages@nirmaan.org.in, Web - www.nirmaan.org.in